

# NSIIRI DUURUNAN

## Dɔnkɛsunguru

N y' a bila sunguru dɔ de kan.

Sunguru nin tɛ foyi kɛ, n'a wulila a bɛ taga tulong kɛ dugu wɛrɛ la. N'a bamuso ma tag'a wele, a tɛ na so. O den tun yaadalen don fo ka tag'a tɛmɛ a dan kan. N'a bamuso tagar'a weleyɔrɔ, a bɛ dɔnkili dɔ de da a bɛ sɔrɔ ka tagama ka n'a ba fɛ. Ni dugu jera tuguni, a bɛ segin ka taga yen. Don O don, a ba bɛ tag'a wele ni dɔnkili ye, a bɛ sɔrɔ ka na.

o tora o la fo suruku nana bɔ o kalama. Suruku k'ale bɛ den nin minɛ k'a jimi, k'o bena sunguruninw lɔgɔbɔ o kana sɔn ka taga tulong kɛ dugu wɛrɛ la. Suruku tagar'a jinw dabɔ ka sɔrɔ ka taga jɔ dugu fila nunu cɛmance la. A ye den nin wele ni dɔnkili ye i n'a fɔ den nin yɛrɛ bamuso. Den nin wulila ka taga se suruku jɔyɔrɔ la, suruku y'a ben, k'a minɛ, k'a jimi. Bololanɛgɛ dɔ tun b'a bolo, suruku y'o bɔ k'o bila sira kan. Bamusoman wulila k'a b'a kɔ gen tuma min na, a tagara bololanɛgɛ nin bennen sɔrɔ sirada la. A ye dɔnkili da, den ma lamine. A tora tagama na ka taga sen gosi den ka bololanɛgɛ la, a y'o ta n'a bɛ kasi ka taga so.

Kabini o don, sunguruw tɛ sɔn ka bɔ o ka dugu la ka taga tulong kɛ dugu wɛrɛ la, sisan sunguru dɔw, o bɛ don mobili la ka taga jamana wɛrɛ la ka dɔn kɛ yen ka sɔrɔ ka segin. O ye dijɛ yɛlemanen ye.

N y'a ta yɔrɔ min, n y'a bila yen.